

**Mino Rāpinā: miā om
haigõmaja juhil süäme pääl**

Kae lk 2

**Majandusprofessor kiroť
Võrosuu koolist raamadu**

Kae lk 3

**Ruitlanõ uur, kiä Estrit
ja Villut puttu taht**

Kae lk 4

**Laultas tulõvadsõ
Uma Pido laulõ**

Seo neläpäävä, 9. mahlakuu pääväl kell 19 tulõ Põlva muusigakoolin Põlva naisi-koori Mai, Võro segäkoori Hilaro ja Põlvamaa miihikoori ütine keväjäkontsõrt.

Kannõtas ette võrokeelitsit laulõ, noidõ siän võrokeelitside koorilaulõ ja -säädide konkursi parõmbit. Saman antas kätte konkursi avvohinna.

Kontsõrti võiva kullõma tulla kõik huvilidsõ ja rahha tuu iist ei küstä.

Taa kontsõrt om üts ettevõtmisist, minka valmistõdas ette tulõvast, tõist Umma Pito. Pido tulõ 29.05.2010 Põlvan Indsikurmun.

**Laulu-tandsuõdak
Pikäkannun**

Pikäkannu kuul kuts rahvamuusiga ja vana ao huviliidsi 17. mahlakuu pääväl (17.04) kell 18 vana Võromaa laulu-, pillimängu- ja tandsuõdakulõ.

Koolijuht Hurda Astrid and teedä, et küllä tulõva rahvapillimängjä Laube Kadri ja Lepassoni Kadri. Paiga pääl saa oppi pilli mängmä, laulda vannu laulõ ja tandsi rahvatandsõ.

«Inne saadami Pikäkannu kooli latsi perrihe viktoriiniküsimüse vana Võromaa kassa kihlkunna kotsilõ,» kõnõf

Hurda Astrid. «Pidol teemi taast küsimisest kokkovõttõ ja jagami avvohindu.»

**Luulõvõistlus
Adsoni avvos**

Seo kuu 24. pääväl kell 14 tulõ Võromaa keskraamadukogo latsiosakunnan Sännä kirämehele Adsoni Arturilõ pühendet võrokeelidse loomingu ettekandmisõ võistlus.

Joba 11. sändse võistlusõ mõttõs om suurt luulõtajat miilde tulõta ja lukõ tõisigi kiränige võrokiilset loomingu. Edimäst luulõvõistlust peeti kümne aastaga iist Adsoni 110. sünnüaastapäävä avvos.

Võrokeelidse luulõ lugõmisõ võistlusõl võiva luulõtuisi lukõ kõiki aoluulidsõ Võromaa kuulõ eri vannusõn koolilatsõ. Egä kooli lugõja kand ette üte pala: Adsoni luulõtusõ vai mõnõ tõõsõ kiroťaja võrokiilse luulõtusõ vai jutu (osa jutust).

Lugõmisõ pikkus ei või olla üle viie minodi. Hindaminõ käü kolmõ vannusõrühmä perrä: 1.–4., 5.–9. ja 10.–12. klass.

Osavõtust pallõldas teedä anda Võro instituuti tel. 782 8753, 5117348 vai kadri.laube@wi.werro.ee nika ku 20.04.2009.

Võistlusõlõ kaema-kullõma omma oodõdu ka kõik võrokeelidse luulõ huvilidsõ.

UL

Opilas-mallõv siski tulõ

PEEDOSAARÕ KAISA

Timahava om külh suur majandusõ vaominõ ja tüüldä inemiisi tulõ egä päiv manõ, a tuust huulmalda saava mi kandi koolilatsõ suvõl opilas-malõvan tüüd tetä.

Võrol kõrraldas opilas-malõvat nuurikeskusõ juht Mee Anneli ja timä sõnno perrä om malõva jaos raha olõman, inämb hätä om tüü löüdmisega.

«Võro liin tugõ 40 liinalatsõst malõvlast 100 000, Võro vald 20 last 50 000 krooniga,» seletä. Malõvalatsi söõgi jaos rahha viil küstäs (Eesti nuursuutüü keskusõ käest).

Tüüd pakva Võro vald ja Navi külä talomiis Trola Jaanus. Plaan olf külh ka Pikäkannu küllä üts malõvarühm tetä, a säääl jakku-i latsilõ katõs nädälis tüüd ja arvada tuud rühmä iks tetä-i.

Latsi naatas Võro liina ja valla malõvahe kirja pandma vahtsõ kuu algusõn. Seoniaoni olõ-i viil malõva kotsilõ väega küsütü, Mee Anneli man om käüntü maad kullõman õnnõ kats



HARJU ÜLLE PILT

Võro nuurikeskusõ noorõ tüüd ei pelgä.

13aastast, kiä vannusõ poolõst minevaasta malõvahe es päse, a sinnä tahtva.

Mee Anneli olõ-i tuuga kokko putnu, et latsõ taha-i vai mõista-i tüüd tetä. Külh olf minevaasta sändsen hädän Sõmmõrpalõ vald ja timahava säääl malõvarühmä inämb ei tetäki.

Põlva maakunna opilas-

malõva «imä», latsikaitsõ ütisüse juht Kutseri Veera seletä, et timahava om opilas-malõvahe plaanit 17 rühmä 297 kotussõga. Rühmä omma joba piaaigu kokko pant.

Tüüd saava pia kõiki valdu ja ka Põlva liina latsõ, vällä jääse Kõllõstõ ja Mooste vald. «A seo om õnnõ plaan ja kõik või viil tõisildõ minnä,» olõ-i

Kutser viil peris kimmäs.

Põlva maakunna opilas-malõval omma õkvalt vastapididse hädä ku Võro malõval: tüüd Põlva kandin jakkus ja ettevõtja võtnu hää meelega latsi tüüle, a latsi palgarahha olõ-i viil kokko saad. «Huvitegevüse jaos om kah rahha veidü,» kõnõf Kutser.

Rõugõ maatiatrippääväl võisõ hinnäst ullis naarda

PEEDOSAARÕ KAISA

Rõugõt peetas külh säitsme järve maas, a mu jaos sai tä minevä kuu lõpun kultuurimaas – maatiatrippääväl sai näütemarõge kaiõn hinnäst ullis naarda ja nätal inne tuud teedä, miä om astromuusika.

28. urbõkuu pääväl sai Rõugõ kultuurimajan nätä, mändsit näütemänge võrokõsõ kokko säädnu omma. Olf säääl näid nii cest- ku võrokeelitsit. Mullõ naksi kõgõ rohkõmb miildümä iks naa võrokeelidse.

Kõgõ põnõvamba näütemängu olli Krabi külätiaatri: «Pinsipäiv» ja «Kiiksu kohvik». «Pinsipäiv» olf nii hää tükk, et taa valiti näütämises ka üle-cestilidse maatiatripe pääväl.

Krabi Külätiaatri lavastaja Mürgü Marje, kiä ka esi tüken ütine tege, kõnõf vällä ka salahusõ, kuis timä luu nii nafalidsõ ja hää ommava: «Kõnõlõ pallo

vanõmbidõ inemiisiga. Näide käest kuulõgi egäsugutsit huvitavit juttõ. Suurõmb jagu etendüsõn oluist olukõrdust ommaki periselt süündünü.»

«Kiiksu kohvik» nime pandmisõl aviti-va ütine Marje vele ja sõsara, kiä eläse Põhja-Eestin. «Ku vele-sõsara ummi sõpruga suvõl maalõ sõitva, sis Talina sõbra iks küsüse vele käest, et kas taa sõsar om kiiksuga? Veli sis iks vasta, et ei olõ.

A sõbra jää-i seo vastussõga rahulõ ja ütles, et kiiksuga piät ju tuu inemine olõma, kes vabahtligult maal eläs. Tuust tuu kiiksu mõtõ tulõ,» tulõf Marje miilde.

Umakiiltsit näütemänge mänge viil puigalaisi trupp ja Mõnistõ näütetsõõr. Viimädsõ tükün kõnõf külh võro kiilt

**Kiiksu kohvik: mehe (Troska Andres ja Loo-ritsa Aare) telvä ettekandja (Antoni Daisy) käest «kiiksu».**

õnnõ tsägataja mutt Nõia-Ella, a tuu iist tekä tä umma tüüd häste: kõkkõ tä näkk ja kõkkõ olf tal vaia külä pääl lakja vitä. Säane om iks egän külän ja kotusõn olõman.

Maatiatripe pääväl kõrraldaja Kõõtsi Riina kai häämeelega

kõiki tükke. Peris kõkkõ tä siski nätä es saa, selle et tä salitõ mugu ümbre ja ai asjo, a kittüst jagi tä külh kõigilõ: «Trupi olli umanõolidsõ ja maalähküdse. Seo om suur asi, ku rahvamajan vai küläseltsin tulõ kokko kamp tegeläisi, kiä omma nõun umma vapa aigu tiatritegemisele pühendämä.»

Riina tahtsõ tennädä kõiki tiatrippäävä tugõjit ja timä soovilõ vasta tullõn mi teemiki tuud: aifuma Eesti kultuurkapitali Võromaa ekspertgrupp ja rahvakultuuri arõndus- ja koolituskeskus!

Nätäl inne tiatrippäivä trehvsõ kah Rõugõlõ, astronomiakonvõrentsile. Kai, kuis viiemeistri Sisaski Urmas tähist kõnõf ja klavõri pääl kosmosõ-muusikat mängse. Muusiga olf külh nii tummõ, et tahtsõ kõrraga är paeda, a tuu iist mõistsõ Urmas põnõvit jut-

tõ ja müüte kõnõlda. Üts mullõ häste miildünü lugu olf säane, et pritsimehe sõidi virmaliisi kistutama. Urmas sis püüdse pritsimiihile seletä, et noid es saaki kistuta. Mõtli, et kuis Urmassõlõ kõik naa luu külh päähä jääse? Tark miis, muud ei mõista üldä.

Tähti mi kahõs kaia es saa, selle et pilve olli iin. Urmassõlõ ollõv külh võimõ näid lakja saata, a millegiperäst tä tuu õdak tuud tetä es taha.

Äkki olõssi pidänü inämb päälä käümä, et Urmas olõssi viisnü uma šamaanitrummi kotist vällä otsi?



PEEDOSAARÕ KAISA PILD

Tsäägataja mutt Nõia-Ella (Kuusõ Tiu, kural) nuhk Mõnistõ tiatritükün küläräha käest salahuisi vällä.

